

Bakal dibina di atas tanah seluas 10 ekar

Kolam tadahan atasi banjir di Rawang

Oleh SITI AINIZA KAMSARI
kota@utusan.com.my

RAWANG 7 Jan. - Sebuah kolam tadahan banjir seluas tiga ekar akan dibina di Batu 23 Jalan Batu Arang-Rawang, di sini bagi mengatasi masalah banjir kilat baru-baru ini.

Pembinaan kolam berdekatan Sungai Gong yang menjadi punca banjir itu akan dijalankan sebaik sahaja mendapat kelulusan kerajaan negeri Selangor.

Pegawai Daerah Gombak, Datuk Nor Hisham Ahmad Dahalan berkata, beliau akan menemui Menteri Besar, Tan Sri Khalid Ibrahim esok bagi mendapatkan kelulusan dan segera membina kolam tadahan di atas tanah seluas 10 ekar itu.

"Setelah mengenal pasti kawasan untuk membina kolam tersebut hari ini, saya akan berusaha untuk menjadikan Rawang sebagai kawasan bebas banjir," katanya.

Beliau berkata demikian ke-

pada *Utusan Malaysia* setelah meninjau kawasan cadangan bagi kolam tadahan tersebut, di sini, hari ini.

Dalam kejadian banjir pada 24 Disember lalu, hujan lebat selama tiga jam menyebabkan banjir kilat di Kampung Sungai Bakau dekat sini, dengan lebih 20 buah rumah dimasuki air sedalam 0.5 meter ekoran

air sungai berdekatan melimpah.

Dalam kejadian kira-kira pukul 5.30 pagi itu, seramai 100 penghuni di kawasan terlibat terjejas selain empat buah kereta turut ditenggelami air.

Kejadian itu juga mengakibatkan ribuan pengguna jalan raya yang melalui Jalan Batu Arang berhampiran Pusat Beli-Belah Aeon Rawang

terkandas untuk ke tempat kerja kira-kira pukul 7 pagi.

Nor Hisham berkata, kolam tersebut dijangka dapat menyelesaikan 90 peratus masalah banjir di Rawang.

"Kolam dan tanah ini adalah milik kerajaan dan kita akan tuntutan di bawah Seksyen 62 Kanun Tanah Negara untuk membinanya dan sa-

ya rasa kita tidak akan menerima bantahan daripada mana-mana pihak," katanya.

Nor Hisham juga meminta beberapa pemaju hartanah di sekitar Rawang supaya segera membina kolam-kolam perangkap lumpur di tapak projek masing-masing bagi mengelak air bertakung dan aliran tersekat.

NOR Hisham Ahmad Dahalan (kiri) menunjukkan lokasi cadangan untuk membina kolam tadahan banjir di Rawang semalam.
- UTUSAN/ZAINI HUSIN

